

施南府志卷之八



知施南府事王協夢監修

典禮

壇廟 儀注

崇德報功垂諸祀典直省郡邑皆同惟施爲新
造壇廟多屬創建方志所宜備紀也至若牲酒
豆籩之數登降上下之節或亦考獻徵文者所
不容畧乎他如迎

詔迎春鄉飲讀法則嘉禮也日月食救護霜降祭旗

施南府志

卷之八

典禮

一

燾則軍禮也並錄之以備掌故志典禮

施南府 恩施縣

社稷壇在府城北門外二里許馬鹿口雍正二年建今

壇垣久圯

宣恩縣在縣城西

來鳳縣在縣北門外乾隆二十一年知縣林翼池捐

建

咸豐縣在縣



利川縣在縣城北門外

建始縣在縣城西門外演武廳之左

社右

稷左異位同壇皆北向

通禮歲以春秋仲月上戊日致祭府知府主之縣知縣主之在城文武官丞史把總皆與眡割牲省盥盛府以佐貳縣以丞若史各一人糾儀府以教授訓導縣以教諭訓導二人執事用掾吏贊相禮儀均於學弟子員內選充

儀注前期主祭官暨陪祭官執事人各於公廡致

施南府志

卷之八

典禮

二

齋三日掃除

壇壝內外具祝版備器陳祭之前夕飭掌饌潔備品物置案於

神廚設香燭眡割牲官公服詣案前上香行三叩禮畢宰人牽牲告膺遂割牲以豆取毛血瘞於坎及祭日雞初鳴執事人入設案一於

壇上正中北向陳鉶二實和羹簋二實稻梁簋二實黍稷籩四實形鹽棗栗鹿脯豆四實菁菹鹿醢芹菹兔醢若不能備各就土所有以其類充案前設俎

陳羊一豕一又前設香案一陳祝文香盤鑪鐙左設一案東向陳篚一實帛二尊一爵六又設福胙於尊爵之次司祝一人司香帛二人司爵二人位案西東面階下之東設洗當階爲主祭官拜位其後爲陪祭官拜位文東武西通贊二人位階下左右糾儀官二人分位陪祭官左右均東西面漏未盡主祭官及陪祭官朝服畢集壇外引贊二人引省盥官入

壇徧眡牲器酒齊饌者告潔退左右引班二人引陪祭

施南府志

卷之八

典禮

三

官入東西序立東班西面西班東面引贊二人引主祭官入至階下盥手通贊贊執事者各司其事贊就位引贊引主祭官引班引陪祭官咸就拜位立贊迎

神引主祭官升詣香案前跪司香跪奉香主祭官三上香興贊復位引主祭官降階復位立贊跪叩興主祭官暨陪祭官行三跪九叩禮贊初獻引主祭官升詣

神位前跪司帛跪奉篚主祭官受篚恭獻仍授司帛興

奠於案司爵跪奉爵主祭官受爵恭獻仍授司爵
興分詣

社

稷位前各奠正中皆退贊讀祝引主祭官詣香案前跪
陪祭官皆跪司祝三叩興奉祝文跪於右讀曰維
某年某月某日某官某致祭於

社

稷之神曰維

神奠安九土粒食萬邦分五色以表封圻育三農而蕃

施南府志

卷之八

典禮

四

稼穡恭承守土肅展明禋時屆仲春秋敬修祀典庶

丸丸松柏鞏磐石於無疆翼翼黍苗佐神倉於不

匱尙

饗讀畢三叩興以祝文復於案退贊叩興主祭官暨
陪祭官三叩興贊復位引主祭官降階復位立贊
亞獻引主祭官升詣

神位前獻爵於左贊終獻獻爵於右均如初獻儀贊
賜福胙引主祭官升詣香案前跪司爵跪進福酒於右
主祭官受爵拱舉司爵接爵興司饌跪進豆內於

左主祭官受豆拱舉司饌接豆興各退贊叩興主祭官三叩興贊復位引主祭官復位立贊送

神贊跪叩興主祭官暨陪祭官行三跪九叩禮贊徹饌執事官徹饌贊瘞祝帛執事官奉祝次香次帛次饌詣瘞所禮畢各退

施南府 恩施縣

先農壇在府城北門外馬鹿口雍正四年建今壇垣久圯壇高二尺一寸寬二丈五尺正房三間中奉

先農神牌紅地金書牌高二尺四寸寬六寸牌座高五

施南府志

卷之八

典禮

五

寸寬九寸五分東貯祭器農具西貯耜田米穀配房二間東置辦祭品西守農居住繚以周垣

宣恩縣在縣城■門外

來鳳縣在縣城東門外乾隆四年建

咸豐縣在縣城東門外

利川縣在縣城東門外

建始縣在縣城東門外雍正五年知縣祖永繩置買耜田四畝九分建神庫三間八年知縣武怡復建

門樓一座

通禮歲以仲春亥日致祭或用季春府知府主之縣知縣主之文武官及各執事人均如祭

社

稷之禮先二日主祭陪祭執事各官致齋公所掃除

壇上下祭日雞初鳴執事人入設

先農神案於

壇正中南向陳鋤一簠一簋二籩豆各四案前設俎陳羊一豕一又前設香案一陳祝文香盤鑪鐙左設一案東向陳帛一尊一爵三陳福酒胙肉於尊

施南府志

卷之八

典禮

六

爵之次設洗於階下之東

儀注質明引班引陪祭官入引贊引主祭官入通贊贊執事者各司其事贊就位引主祭官至階下盥手畢就拜位立陪祭官案班就東西拜位立均北面迎

神上香讀祝行三獻禮祝辭曰維某年月日某官某致祭於

先農之神曰惟

神肇興稼穡立我烝民頌思文之德克配彼

天念率育之功陳常時夏茲當東作咸服先疇洪惟九五之尊歲舉

三推之典共膺守土敢忘勞民謹奉彝章聿修祀事惟

願五風十雨嘉祥恒沐

神庥庶幾九穗雙歧上瑞頻書大有尙

饗餘儀與祭

社稷同祭畢率屬行耕藉禮

藉田在

先農壇側有事

施南府志

卷之八

典禮

七

先農之日知府率在城文官耕藉是日首縣知縣眡士

宜備穀種青箱朱鞭耒服耜黝牛及他農器耕器

豫陳耕耨耆老率農夫披蓑戴笠蒞於田間通贊

學弟子員分立田首又向

闕張畫屏設香案一南向通贊立香案之南引班教

諭訓導立通贊之南皆西面致祭

先農禮畢各官易蟒袍詣藉田通贊贊行耕藉禮知府

以下就耕所執事者授耒耜與鞭皆右秉耒左執

鞭進耕知府知縣以丞一人執種箱史一人播種

皆耆老一人牽牛農夫二人扶犁各九推九返畢
釋鞭耒以次序立田首西向北上農夫遂終畝告
畢事各官補服望

闕立通贊贊齊班引班分引各官至香案前按班序
立重行北面耆老農夫稍遠列行北面隨立贊跪
叩興行三跪九叩禮興各退各縣則正官率佐貳
丞史耕藉各以耆老二人執箱播種餘儀同

文廟府學在城內象牙山下

恩施縣學在城南門內

施南府志

卷之八

典禮

八

宣恩縣學在縣城西

來鳳縣學在縣城內東北

咸豐縣學在縣城東

利川縣學在縣城南門內

建始縣學在縣城內西北隅

崇聖祠府學在 大成殿西

恩施縣學在 大成殿後東

宣恩縣學在 大成殿後

來鳳縣學在

咸豐縣學在

利川縣學在

建始縣學在

大成殿內

至聖先師正位南向

復聖顏子

述聖子思子東位北上西向

宗聖曾子

亞聖孟子西位北上東向

施南府志

卷之八 典禮

九

東序

先賢閔子損冉子雍端木子賜仲子由卜子商有于

若皆北上西向

西序

先賢冉子耕宰子予冉子求言子偃顓孫子師朱子

熹皆北上東向

東廡

先賢蘧瑗澹臺滅明原憲南宮适商瞿漆雕開司馬

耕梁鱣冉孺伯虔冉季漆雕徒父漆雕哆公西赤

任不齊公良孺公肩定鄒單罕父黑榮旗左人郢
鄭國原亢廉潔叔仲會公西輿如邾異陳亢琴張
步叔乘秦非顏噲顏何縣亶樂正克萬章周敦頤
程顥邵雍

先儒公羊高伏勝董仲舒后蒼杜子春諸葛亮王通
陸贄范仲淹歐陽修楊時羅從彥李侗呂祖謙蔡
沈陳淳魏了翁王柏趙復許謙吳澄胡居仁王守
仁羅欽順黃道周湯斌均北上西向

西廡

施南府志

卷之八

典禮

十

先賢林放宓不齊公冶長公皙哀高柴樊須商澤巫
馬施顏辛曹卹公孫龍秦商顏高壤駟赤石作蜀
公首夏后處奚容蒧顏祖句井疆秦祖縣成公祖
句茲燕伋樂欬狄黑孔忠公西蒧顏之僕施之常
申枏左邱明秦冉牧皮公都子公孫丑張載程頤
先儒穀梁赤高堂生孔安國毛萇鄭康成范甯韓愈
胡瑗司馬光尹焞胡安國□栻陸九淵黃幹眞德
秀何基東□□□□衡薛瑄陳獻章蔡清呂坤
劉宗周孫奇逢陸隴其均北上東向

通禮歲以春秋仲月上丁行釋奠禮正獻知府主
之兩序兩廡以知縣教職分獻眡割牲省盥盛以
佐貳糾儀以教職司祝司香司帛司饌引贊通贊
引班以學弟子員嫻禮儀者執事在城文武官咸
與祭縣以知縣爲正獻官前期致齋二日祭前一
日飭廟戶潔掃廟宇內外眡割牲官公服詣神廚
眡割牲如儀正獻官率執事人入學習儀禮生十
四名
教官率樂舞生入學習舞習吹伶舞生三十六名
樂工五十二名
夜分具器陳

施南府志

卷之八

典禮

十一

先師位前牛一羊一豕一登一鉶二簋二籩二簋二籩十豆
十鑪一鐙二

四配位前各羊一豕一鉶二簋二籩二籩八豆八鑪
一鐙二

十二哲位前鉶一簋一籩一籩四豆四東西各羊一
豕一鑪一鐙二殿中設一案少西北向供祝版其
東南設一案西向陳禮神制帛九白色香盤四尊三
爵二十有七西設一案東向陳禮神制帛八香盤
三尊二爵二十有四凡牲陳於俎凡帛正位四配

異篚十二哲東西共篚凡尊實酒承以舟疏布冪
勺具東廡二位同案每位爵一實酒每案簠一簋
一籩四豆四

先賢位前羊二豕二香案一鑪一鐙二

先儒案前羊一豕一香案一鑪一鐙二設案一於南

北向陳禮神制帛二香盤二尊三虛爵六俎篚冪
勺具東西兩廡陳設同設洗於階下之東

通禮樂器陳設兩階編鐘在東編磬在西皆十有
六懸以簾業東應鼓一柷一麾一西敵一東西分

施南府志

卷之八

典禮

十二

列琴六瑟四簫六篴六箎四排簫二塤二笙六搏
拊二旌二羽籥三十有六

儀注祭之日雞初鳴各官豫集於明倫堂均朝服
味爽贊禮生二人引承祭官由大成左側門入又
禮生八人分引兩序兩廡分獻官隨入至階下之
東盥手畢引至階下拜位前立引班引陪祭官由
左右側門入各就拜位序立典儀唱樂舞生登歌
執事者各司其事文舞六佾進贊禮生贊就位承
祭官分獻官陪祭官各就位立典儀贊迎

神司樂贊舉迎

神樂奏昭平之章樂作贊禮生贊就上香位引承祭

官升東階入殿左門贊詣

先師香案前跪承祭官跪行一叩禮興贊上香司香跪

奉香承祭官上炷香三上瓣香跪行一叩禮興

贊不

以次詣

四配位前跪上香儀同贊復位引承祭官退降階復位初迎

神時贊禮生分引東西序分獻官各一人升東西階

施南府志

卷之八

典禮

十三

入殿左右門詣

十二哲位前跪上香退降階復位引兩廡分獻官東西各二人分詣

先賢

先儒位前跪上香退復位均如前儀贊禮生贊跪叩

興承祭官分獻官暨陪祭官均行三跪九叩禮興

樂止典儀贊奠帛爵行初獻禮贊奏宣平之章舞

羽籥之舞樂作贊禮生引承祭官升階贊詣

先師位前贊跪承祭官跪行一叩禮興司帛跪奉篚承

祭官受篚拱舉奠於案司爵跪奉爵承祭官受爵
拱舉奠於塾中跪行一叩禮興贊不贊禮生贊就讀
祝位引承祭官至殿中拜位立贊跪承祭官分獻
官暨陪祭官皆跪贊讀祝司祝跪讀祝辭曰維某
年月日某官某致祭於

至聖先師孔子曰惟

先師德隆千聖道冠百王揭日月以常行自生民所未
有屬

文教昌明之會正禮和樂節之時辟雍鐘鼓咸恪薦

施南府志

卷之八

典禮

十四

於馨香泮水膠庠益致嚴於籩豆茲當仲春秋祇率

彝章肅展微忱聿將祀典以

復聖顏子

宗聖曾子

述聖子思子

亞聖孟子配尙

饗讀畢奉祝版跪安

先師位前篚內三叩興退樂作贊跪叩興承祭官分獻
官暨陪祭官均行三叩禮贊禮生引承祭官以次

詣

四配位前跪奠帛獻爵儀同退降階復位門退出殿左

復位見舊通禮贊禮生分引兩序分獻官詣

十二哲位前跪奠帛獻爵降階復位均如儀引兩廡

分獻官詣

先賢

先儒位前奠帛獻爵復位儀同樂止亞獻奏秩平之

章舞同初獻樂作贊禮生引承祭官升階贊詣

先師位前暨

施南府志

卷之八典禮

十五

四配位前奠爵於左如初兩序兩廡隨分獻畢均復

位樂止終獻奏敘平之章舞同亞獻樂作引承祭官升

階奠爵於右如亞獻儀兩序兩廡隨分獻畢均復

位樂止文德之舞退典儀贊飲福受胙贊禮生贊

詣受福胙位引承祭官至殿中拜位立奉福胙二

人自東案捧福胙至

先師位前拱舉退立於承祭官之右接福胙二人自西

案進立於左贊禮生贊跪承祭官跪贊飲福酒右

一人跪遞福酒承祭官受爵拱舉以授於左接以

興次受胙如飲福酒之儀贊叩興承祭官三叩興贊復位引承祭官退降階復位贊跪叩興承祭官分獻官暨陪祭官均行三跪九叩禮興典儀贊徹饌奏懿平之章樂作徹畢樂止贊送

神奏德平之章樂作贊禮生贊跪叩興承祭官分獻官暨陪祭官行三跪九叩禮興樂止典儀贊奉祝帛饌送燎有司各奉祝帛香饌恭送燎所如儀承祭官避立拜位西旁竢過復位樂作贊禮生引承祭官詣燎所視燎畢仍引由左側門出樂止陪祀

施南府志

卷之八

典禮

十六

各官皆退

崇聖祠殿內

肇聖王木金父正中

裕聖王祈父左

詒聖王防父右

昌聖王伯夏次左

啟聖王叔梁紇次右皆南向

先賢顏無繇孔鯉東位西向

先賢曾點孟孫氏西位東向均北上

東廡

先儒周輔成程昫蔡元定西向

西廡

先儒張迪朱松東向均北上

通禮

正位前各羊一豕一鉶二簠簋各二籩豆各八鑪一鐙
二配位前簠一簋一籩四豆四東西羊豕各一鑪
一鐙二中設一案少西供祝版東設一案陳禮神
制帛五白色香盤六尊四爵十有五西設一案陳禮

施南府志

卷之八

典禮

十七

神制帛四香盤四尊三爵十有二兩廡東二案西
一案每位爵一實酒每案陳設簠簋籩豆羊豕鑪
鐙如配位之數各南設一案陳禮神制帛一香盤
一尊一虛爵三俎篚冪勺皆具設洗於階下之東
儀注上丁同時致祭正獻以教官兩廡分獻以食
餼弟子員各一人贊禮生引承祭官入祠垣左門
引分獻官隨入承祭官詣階下盥手典儀贊執事
者各司其事贊禮生贊就位承祭官分獻官就位
立典儀贊迎

神司香奉香盤就各案前立贊禮生贊就上香位引承祭官升東階入殿左門贊詣

肇聖王位前跪承祭官跪行一叩禮興贊上香司香跪

奉香承祭官上炷香三上瓣香跪行一叩禮興贊不

次詣左右正位前跪上香儀同降階復位贊禮生引分獻官升東西階入殿左右門分詣四配兩廡位前跪上香如儀降階復位贊禮生贊跪叩興承祭官分獻官行三跪九叩禮興典儀贊奠帛爵行初獻禮贊禮生引承祭官升階贊詣

施南府志

卷之八

典禮

十八

中案前跪承祭官行一叩禮興司帛跪奉筐承祭官受筐拱舉奠於案司爵跪奉爵承祭官受爵拱舉奠於墊中跪行一叩禮贊不以次詣左右正位案前跪奠帛獻爵儀同贊禮生贊就讀祝位引承祭官詣殿中拜位立司祝至祝案前跪三叩奉祝版跪案左贊跪承祭官分獻官皆跪贊讀祝司祝讀祝辭曰維某年月日某官某致祭於

肇聖王

裕聖王

詒聖王

昌聖王

啟聖王曰惟

王奕葉鍾祥光開聖緒成德之後積久彌昌凡聲教所

覃敷率循源而溯本宜肅明禋之典用申守土之

忱茲屆仲春秋聿修祀事配以

先賢顏氏

先賢曾氏

先賢孔氏

施南府志

卷之八 典禮

十九

先賢孟孫氏尙

饗讀畢興奉祝版跪安

肇聖王位前筐內三叩興退贊禮生贊跪叩興承祭官

分獻官行三叩禮興贊復位引承祭官出降階復

位贊禮生引正殿分獻官升東西階入殿左右門

詣配位前引兩廡分獻官分詣兩廡位前跪奠帛

獻爵興復位均如正獻儀亞獻各獻爵於左終獻

各獻爵於右均如初儀典禮贊徹饌有司徹饌畢

贊送

神贊禮生贊跪叩興承祭官分獻官行三跪九叩禮
興典儀贊奉祝帛饌送燎司祝司帛司香司爵各
奉祝帛香饌以次恭送燎所如儀承祭官避立西
旁竢過復位贊禮生引詣燎所視燎贊禮畢仍引
由祠垣左門出各退

通禮月朔釋菜望日上香教授教諭訓導等官分
班行禮

施南府 恩施縣

忠義孝弟祠在

施南府志

卷之八

典禮

二十

宣恩縣在

來鳳縣在

咸豐縣在

利川縣在

建始縣在

施南府 恩施縣

節孝祠在

宣恩縣在

來鳳縣在

咸豐縣在

利川縣在

建始縣在

施南府學

名宦祠在 文廟戟門之左各縣學同

隋清江令李超

唐施州刺史南承嗣

唐施州刺史房武

唐施州司戶叅軍張道古

施南府志

卷之八 典禮

二十一

宋建始令李庭芝

宋施州刺史龐恭孫

宋施州刺史寇瑛

宋清江縣主簿任伯雨

宋施州通判程公許

宋施州攝判王在

宋施州通判李周

宋施州巡檢使侯廷賞

明施州令譚朗然

明施州指揮僉事朱永

明施州衛教授龐一德

明施州衛經歷黃溥

明湖廣按察司僉事兵備道駐劄施州衛李堯德

施南府學

鄉賢祠在 文廟戟門之右各縣學同

周巴國將軍巴蔓子

漢教授尹珍

宋鴻博狀元詹邈

施南府志

卷之八

典禮

二十二

明淮安府知府事申朝

明霍州州同童希賜

明交州府同知向德豪

明淮安總兵童景

明叅軍童希益

明孝子陳鑛

恩施縣崇祀名宦鄉賢二祠與府學同

通禮春秋釋奠禮畢教職一人公服詣四祠致祭

引贊贊跪主祭官跪讀祝辭曰維某年月日某官

某致祭於

忠義孝弟之靈曰惟

靈稟賦貞純躬行篤實忠誠舊發貫金石而不渝
義問宣昭表鄉閭而共式祇事懋彝倫之大性摯
莪蒿克恭念天顯之親情殷棣萼模楷咸推夫懿
德

綸恩特闡其幽光祠宇維隆歲時式祀用陳尊簋來格
几筵尙

饗讀畢以祝文復於案退主祭官俯伏興執事者酌

施南府志

卷之八

典禮

二十三

酒獻於左又酌酒獻於右退引贊贊跪叩興主祭
官跪三叩興執事者以祝帛送燎引贊引主祭官
出執事者徹皆退各祠致祭儀同

通禮節孝祠祝曰維某年月日某官某致祭於
節孝之靈曰惟

靈純心皎潔令德柔嘉矢志完貞全閨中之亮節
竭誠致敬彰闔內之芳型茹冰蘖而彌堅清操自
勵奉盤匱而匪懈篤孝傳徽

絲綸特沛乎殊恩祠宇昭垂於令典祇循歲祀式薦尊

醪尙

饗餘儀同

謹按通禮名宦鄉賢二祠祝文各省州縣所在異辭不悉載

施南府 恩施縣

神祇壇在府城南門外南郡書院之左壇垣久圯

宣恩縣在縣城南門外

來鳳縣在縣城南門外乾隆二十一年知縣林翼池
捐建

咸豐縣在縣城■門外

施南府志

卷之八 典禮

二十四

利川縣在縣城南門外

建始縣在縣城北門外

通禮歲春秋仲月諏吉致祭府知府主之縣知縣
主之在城文武各官皆與設案一於壇正中南向
雲雨風雷之神位居中

施南府境內山川之神位左

施南府城隍之神位右案陳鋤一簠二簋二籩豆各
四案前設俎陳羊一豕一又前設香案一陳祝文
香盤鑪鐙西設一案陳帛七尊一爵二十有一福

酒胙肉於尊俎之次

儀注祭日有司供具執事人預八序立引班引陪祭官入引贊引主祭官入通贊贊執事者各司其事贊就位引主祭官至階下盥手就拜位立陪祭官按班就東西拜位立均北面迎神上香讀祝行三獻禮祝辭曰維某年月日某官某致祭於

雲雨風雷

施南府境內山川之神

施南府城隍之神曰惟

施南府志

卷之八

典禮

二十五

神贊襄天澤福佑蒼黎佐靈化以流行生成永賴乘氣機而鼓盪溫肅攸宜磅礴高深長保安貞之吉憑依鞏固實資捍禦之功幸民俗之殷盈仰

神明之庇護恭修歲祀正值良辰敬潔豆籩祇陳牲幣尙

饗餘儀節與祭

社稷司

歲孟夏後諏吉雩祭陳設儀注同前若間不雨及潦諏宜祀之辰具祝文

隨時擬撰

備牲牢籩豆香帛尊

爵鑪鐙守土府縣官率屬素服虔禱爲民請命行
禮儀節與常祀同旣應而報陳設供具朝服行報
祀禮儀節均與祈祀同

施南府 恩施縣

關帝廟在城內學宮之右南向雍正八年建乾隆三十

五年知府張映燾重修道光二年知府琦昌捐廉

諭紳士李大睿李文玉陳啟棟朱輝憲補修

一在南城

上一在南門外
一在北門外

宣恩縣在縣城東南

施南府志

卷之八 典禮

二十六

來鳳縣在縣城南乾隆四年建

咸豐縣在縣城東門外

利川縣在縣東門內乾隆五年建五十九年邑令陳

春波訓導張定模典史李裕泰勸捐重修

建始縣在縣西門大街乾隆二十年知縣余本詳修

通禮歲以春秋仲月及五月旬有三日致祭府知

府主之縣知縣主之後殿以丞史執事以禮生是

日昧爽廟祝潔掃殿宇內外具祝版備器陳

神位前牛一羊一豕一豮一登一鉶二簠簋各二籩豆各十

鑪一鐙二殿中設一案少西北向供祝版東設一案陳禮神制帛白色香盤一尊一爵三牲陳於俎帛實於篚尊實酒冪勺具設樂於西階上設洗於東階上承祭官拜位在殿內正中之按今郡中現行禮文東武西官拜位在殿內正中祭文昌廟同儀注質明承祭官朝服詣廟贊禮生二人引承祭官由廟左門入至東階上盥手畢進殿東門詣拜位前立典儀贊執事者各司其事贊禮生贊就位引承祭官就位立典儀贊迎

施南府志

卷之八

典禮

二十七

神樂作贊禮生贊詣上香位引承祭官就香案前立贊上香司香跪奉香承祭官上炷香三上瓣香畢贊復位引承祭官復位立贊跪叩興承祭官行三跪九叩禮興典儀贊奠帛爵行初獻禮有司揭尊冪勺挹酒實爵樂作司帛奉篚司爵奉爵各進至神位前司帛跪奠篚於案三叩興司爵立獻爵於案正中各退司祝詣祝案前跪三叩興奉祝版跪案左樂暫止贊禮生贊跪承祭官跪典儀贊讀祝司祝讀祝辭曰維某年月日某官某致祭於

忠義神武靈佑仁勇威顯關聖大帝之神曰惟

帝浩氣凌霄丹心貫日扶正統而彰信義威震九州完

大節以篤忠貞名高三國

神明如在徧祠宇於寰區靈應丕昭薦馨香於歷代屢

徵異蹟顯佑羣生恭值仲春秋嘉辰遵行祀典筵陳

籩豆几奠牲醪尙

饗讀畢以祝版跪安於筐內叩如初興退贊禮生贊

叩興承祭官行三叩禮興典儀贊行亞獻禮樂作

司爵獻爵於左如初獻儀典儀贊行終獻禮樂作

施南府志

卷之八

典禮

二十八

司爵獻爵於右如亞獻儀典儀贊徹饌樂作有司

徹畢贊送

神贊禮生贊跪叩興承祭官行三跪九叩首禮興樂止

典儀贊奉祝帛饌送燎有司奉祝帛香饌以次送

燎如儀贊望燎贊禮生引承祭官詣燎位眡燎禮

畢樂止各官皆退

通禮同日祭後殿府縣均以丞史將事

光昭公位中

裕昌公左

成忠公右均南向位各異案每案羊一豕一鉶二簠簋各二籩豆各八鑪二鐙二殿中設案少西北向供祝版東西各設一案分陳禮神制帛白色香盤三爵九尊三俎篚冪勺具設洗於後垣門內甬通東承祭官位殿檐下正中執事人各以其職爲位如常儀質明承祭官由前左門入後垣中門盥手升階就位迎

神引詣正位前上香畢以次詣左右位前上香復位行二跪六叩禮初獻讀祝如儀祝辭曰維某年月日

施南府志

卷之八

典禮

二十九

某官某致祭於

關帝之

曾祖光昭公

祖裕昌公

父成忠公曰惟

公世澤貽庥靈源積慶德能昌後篤生神武之英善則歸親宜享尊崇之報列上公之封爵

錫命攸隆合三世之肇禋典章明備恭逢仲春秋諏吉祇

事薦香尙

饗凡儀節皆與前殿同

通禮五月十三日致祭

關帝廟前殿

神位前陳牛一羊一豕一果實五盤鑪鐙具陳設及行

禮儀節與春秋祭同祝辭曰維某年月日某官某

致祭於

忠義神武靈佑仁勇威顯關聖大帝之神曰惟

神純心取義亮節成仁允文允武迺聖迺神功高當世

德被生民兩儀正氣歷代明禋英靈丕著封號聿

施南府志

卷之八

典禮

三十

新敬修歲事顯佑千春尙

饗

通禮同日致祭後殿每案羊一豕一果實五盤典

儀不贊徹饌司爵以執事生餘陳設及行禮儀節

與春秋祭同祝辭曰維某年月日某官某致祭於

關帝之

曾祖光昭公

祖裕昌公

父成忠公曰禮隆報祀誼重推恩當崧生嶽降之期溯

木本水源之始輝煌棟宇憑依已妥於上公修潔
豆籩將饗告虔於仲夏惟

神昭鑒尙其格歆

施南府 恩施縣

文昌廟原在城南門外卽衛學舊址今改爲書院嘉慶

三年知施南府事前恩施縣知縣尹英圖移建於

城內鼇脊山上

宣恩縣在縣城東

來鳳縣在縣城南門內

施南府志

卷之八

典禮

三十一

咸豐縣在縣城東門外

利川縣原在城東乾隆二年建嗣移於西關外嘉慶

八年訓導張定模勸移建於學署左

建始縣在東門外乾隆辛亥年知縣趙源生重修

通禮歲以二月三日暨仲秋月諏吉致祭具祝版

備器陳設洗辨位設樂均與祭

關帝廟同

儀注祭日昧爽廟祝潔掃殿宇內外具祝版備器

陳

神位前陳牛一羊一豕一登一鉶二簠簋各二籩豆各十鑪一鐙二殿中設一案少西北向供祝版東設案一陳禮神制帛白色香盤一尊一爵三凡牲陳於俎帛實於筐尊實酒冪勺具設樂於西階設洗於東階上承祭官拜位在殿內正中執事各以其職爲位質明承祭官朝服詣廟贊禮生二人引承祭官由廟左門入至東階上盥手畢進殿東門詣拜位前立典儀贊執事者各司其事贊禮生贊就位引承祭官就位立典儀贊迎

施南府志

卷之八

典禮

三十二

神樂作贊禮生贊詣上香位引承祭官就香案前立贊上香司香跪捧香承祭官上炷香三上瓣香畢贊復位引承祭官復位立贊跪叩興承祭官行三跪九叩禮興典儀贊奠帛爵行初獻禮有司揭尊冪勺挹酒實爵司帛捧筐司爵捧爵進至神位前司帛跪奠筐三叩興司爵立獻爵於案正中各退司祝詣祝案前跪三叩興捧祝版跪案左樂暫止贊禮生贊跪承祭官跪典儀贊讀祝司祝讀祝辭曰維某年月日某官某致祭於

文昌帝君曰惟

神蹟著西潼樞環北極六匡麗曜協昌運之光華累代

垂靈爲人文之主宰扶正久彰夫感應薦馨宜致

其尊崇茲屆仲春秋用昭時祀尙其歆格鑒此精虔

尙

饗讀畢興以祝版安於筐叩如初興退贊禮生贊跪

叩興承祭官行三叩禮興典儀贊行亞獻禮司爵

獻爵於左贊行終獻禮司爵獻爵於右均如初獻

儀典儀贊徹饌有司徹畢贊送

施南府志

卷之八

典儀

三十三

神贊禮生贊跪叩興承祭官行三跪九叩禮興樂止典

儀贊捧祝帛饌送燎有司捧祝帛香饌以次送燎

贊望燎贊禮生引承祭官詣燎位視燎禮畢樂止

承祭官及執事者皆退

通禮同日祭後殿

文昌帝君先代神位前設一案陳羊一豕一鉶二簋簋

各二籩豆各八鑪一鐙二承祭官行二跪六叩禮

祝辭曰維某年月日某官某致祭於

文昌帝君之

前代曰祭引先河之義禮崇反本之思矧夫世德彌光
延賞斯及祥種累代炯列宿之精靈化被千秋爲
人文之主宰是尊後殿用答前庥茲值仲春秋肅將
時事用申告潔

神其格歆尙

饗餘陳設器數及行禮儀節均與祭

關帝廟後殿同

施南府 恩施縣

龍神祠在府城南門內縣學之西嘉慶十五年知府譚

施南府志

卷之八

典儀

三十四

光祥建

宣恩縣在縣

來鳳縣在縣

咸豐縣在縣東門外

利川縣在縣南門外

建始縣在縣南門外

通禮歲以春秋仲月辰日致祭前期有司具祝文
飭廟戶潔掃祠宇拂拭神案備執事人具器陳羊
一豕一簠簋各二籩豆各十鑪一鐙二陳祝文于

案左陳帛一香盤一壺一爵三於案右

儀注主祭官朝服詣祠贊禮生二人引入拜位前立典儀贊迎

神樂作贊禮生贊就上香位引主祭官就香案前立司帛自右奉香盤進主祭官上炷香三上瓣香訖贊復位引主祭官復位贊跪叩興主祭官行三跪九叩禮興典儀贊奠帛爵行初獻禮司帛跪奠篚獻帛於案三叩興司爵酌酒實爵獻於正中皆退司祝詣祝案前跪三叩興奉祝版跪案左樂暫止典

施南府志

卷之八

典禮

三十五

儀贊讀祝引贊贊跪主祭官暨各官皆跪祝辭曰維某年月日某官某致祭於

龍王之神曰惟

神德洋寰海澤潤蒼生永襄水土之平經流順軌廣濟泉源之用膏雨及時績奏安瀾占大川之利涉功資育物欣庶類之蕃昌仰藉

神庥宜隆報享謹修祀典式協良辰敬布几筵肅陳牲

幣尙

饗

祝辭本湖
北通志

讀祝畢興奉祝版安於篚叩如初贊禮

生贊跪叩興主祭官及各官行三叩禮興典儀贊
行亞獻禮司爵酌酒獻於左典儀贊行三獻禮司
爵酌酒獻於右退迺徹饌送

神引贊贊跪叩興主祭官行三跪九叩禮興執事者以
祝帛送燎禮畢各退

施南府

昭忠祠在 府城隍廟內右側

通禮歲春秋仲月諏吉致祭陳設器數儀節與忠
孝節義祠同

施南府志

卷之八

典禮

三十六

施南府 恩施縣

厲壇在府城北門外振武橋之北

宣恩縣在縣城北門外

來鳳縣在縣城北門外乾隆二十一年建

咸豐縣在縣城北門外

利川縣在縣城北門外

建始縣在縣城北門外

通禮歲三月寒食節七月望十月朔祭厲壇於城
北郊

儀注前期守土官飭所司具香燭公服詣

神祇壇以祭厲告

本境城隍之神上香跪三叩興退至日所司陳羊三豕
三米飯三石尊酒棉帛於祭所設燎鑪於壇南質
明贊禮生二人引守土官公服詣

神位前贊跪守土官跪贊上香守土官三上香贊叩興
守土官三叩興退執事者焚棉帛守土官詣燎鑪
前祭酒三爵退禮生仍奉

城隍神位還

施南府志

卷之八

典禮

三十七

神祇壇退

迎

詔

通禮有司豫於公廡設屏南向屏前設

詔案又前設香案案東設臺階下爲文武官拜位文東
武西重行異等如朝賀儀紳士班於文官之末耆
老軍民集於武官之末皆北面宣詔官一人展詔
官二人立臺下西面通贊者立香案左右引禮生
立百官班位左右皆東西面

儀注

詔及郊守土官備龍亭旗仗出迎使者承

詔書以架奉陳龍亭內乘馬後隨鼓樂前導文武官朝

服出迎道右跪候過輿先至公廡門外序立紳士

耆老軍民畢會

詔至門跪迎如初禮使者下馬從龍亭入衆隨入使者

奉

詔書陳於案退立案東西面引禮生引羣官就位北面

立通贊贊跪叩興衆行三跪九叩禮贊宣

施南府志

卷之八

典禮

三十八

詔使者奉

詔授宣詔官復位立宣詔官跪接登臺展詔二人從升

均西面展

詔書宣讀訖復於案皆降衆聽贊復行三跪九叩禮如

初退

宣講

聖諭

通禮月朔望府縣各飭所部民齊集公所選醇謹

耆老一人爲約正有司公服泣恭宣

世祖章皇帝欽定六諭

聖祖仁皇帝聖諭十六條

世祖憲皇帝聖諭廣訓兵民園聽宣畢各退鄉堡均擇適中地爲鄉約所選老成公正一人爲約正樸實謹守者三四人直月按期集所部民宣講

聖諭擇律文內民俗易犯者咸宣示之守土官實力董率並飭縣令教職隨時巡行宣導

迎春

通禮先立春日府縣於東郊造芒神土牛立春在

施南府志

卷之八

典禮

三十九

十二月望後芒神執策當牛肩在正月朔後當牛腹在正月望後當牛膝示民農事早晚

儀注屆立春日吏設案於芒神春牛前陳香燭菓酒之屬案前布拜席通贊執事者於席左右立府縣正官率在城文武官丞史以下朝服畢詣東郊立春時至通贊贊行禮正官一人在前餘以序列行就拜位贊跪叩興衆行一跪三叩禮執事者舉壺爵跪於正官之左正官受爵酌酒酹酒三授爵於執事者復行三叩禮衆隨行禮興迺昇芒神土

牛鼓樂前導各官後從迎入城置於公所各官執采杖環立樂工擊鼓擊土牛三迺各退

鄉飲酒禮

通禮歲孟春望日孟冬朔日舉行鄉飲酒之禮於學官府以守縣以令爲主人以鄉之年高六十以上有德行者一人爲賓其次一人爲介又其次爲衆賓以教官一人爲司正學弟子習禮者二人司爵二人贊禮二人引禮一人讀律令僚佐皆與前期戒賓賓禮辭許戒介亦如之

右戒賓介

先一日

施南府志

卷之八

典禮

四十

司正率執事者詣講堂肆儀設監禮席次於庭東北面布賓席於堂西北南向主人席於堂東南西南向介席於堂西南東向衆賓之長三人席於賓西南向東上皆專席不屬衆賓於西序東向僚佐席於東序西向皆北上司正席於主人之東北向

如有

鄉大夫來觀禮者坐於東北三品以設律令案一上席南向四五品席西向無則闕之

於主介間正中東西肆設尊案一於東序端南北肆設樂於西階下如儀

右陳設布席

儀注屆日質明執事者入具饌設尊於案實酒於

尊加冪勺觶爵在尊北讀律令者奉律令陳於中案監禮者朝服詣學宮主人率司正及僚屬咸朝服入迺使人速賓介屆時賓介盛服至序立於庠門外之右介居賓南衆賓居介南皆東面北上執事以賓至告於主人主人出迎賓西面揖賓介以下東面答揖主人入門左賓揖介介揖衆賓以次入門右當階主人揖及階揖賓皆答揖主人與賓讓升三讓賓三辭主人升賓迺升主人東階上賓西階上贊者贊拜主人西面再拜賓東面答拜興

施南府志

卷之八

典禮

四十一

卽席主人降延介一讓升介升拜如賓禮就位主人迺延衆賓衆賓以次皆升主人揖賓長皆答揖衆賓卽席主人率僚佐以下皆卽席

右迎賓贊

贊者贊揚觶執事者引司正由東階升詣堂中賓介皆起立贊揖司正揖賓介以下答揖司爵詣酒尊所舉冪酌酒於觶進授司正司正揚觶而語曰恭惟

朝廷率由舊章敦崇禮教舉行鄉飲非爲飲食凡我長幼各相勸勉爲臣盡忠爲子盡孝長幼有序兄友

弟恭內睦宗族外和鄉黨無或廢墜以忝所生讀畢贊者贊司正飲酒司正立飲畢以觶授執事者反於案贊揖司正揖賓介以下皆揖司正復位賓介以下皆坐右揚觶贊讀律令執事者舉律令案於中堂引禮引讀律令者就案前北面立賓介主人以下聽贊咸起立旅揖如司正揚觶禮迺讀律令曰律令凡鄉飲酒序長幼論賢良高年有德者居上其次序齒列坐有過犯者不得干與違者罪以違制失儀則揚觶者以禮責之讀畢復位賓介

施南府志

卷之八

典禮

四十二

以下皆坐

右讀律令

贊者贊供饌執事者舉饌案

於賓前次介次主人衆賓以下徧舉訖贊獻賓主人起離席北面立司爵詣酒尊所酌酒實爵授主人主人受爵詣賓席奠於案稍退賓避席立於主人之左贊拜主人再拜賓答拜皆復位立贊賓酢主人賓離席司爵酌酒授賓賓受爵介從詣主人席前拜送爵主人答拜如前儀復位主人起獻介介酢主人如前儀皆坐執事者徧獻三賓衆賓爵訖

右獻賓賓酢主人

酒數行工升歌周詩鹿鳴三

章卒歌笙奏

御製補南陔詩辭曰我逝南陔言陟其岵昔我行役瞻望有父欲養無由風木何補我逝南陔言陟其屺今我行役瞻望有母母也倚閭歸則寧止南陔有筍籜實勺之孱孱孩提孰噢咻之慎爾溫清潔爾旨餼今爾不養日月其慆

御製補白華詩辭曰有白者華不污纖塵咨爾士兮宜修其身不修其身乃貽羞於二人有白者華婉茲靜好咨爾女兮宜修婦道不修婦道迺貽羞於二

施南府志

卷之八

典禮

四十三

老白華匪玉涅而不淄白華匪蘭芬迺勝之我擷白華載詠載思白華匪玉質玉之令白華匪蘭臭蘭之淨我擷白華載思載詠

御製補華黍詩辭曰瞻彼阪田黍華以秀胼手胝足惟勤斯茂我農夫瞻彼阪田黍華以秀胼手胝足惟勤斯茂華有不秀矣秀有不實矣其雨其雨矣杲杲日出矣愁予愁之恤矣閒歌周詩魚麗南有嘉魚南山有臺三章笙奏

御製補由庚詩辭曰王庚便便東西朔南六符調燮八

風節宣王庚容容朔南西東維敬與勤百王道同
王庚廓廓東西南朔先憂而憂後樂而樂王庚恢
恢南朔東西皇極孰建惟德之依

御製補崇邱詩辭曰澗松童童蛙黽鄰兮邱草萋萋蕩
青雲兮凡百君子慎迺託身兮澗松童童澗則卑
兮邱草萋萋邱則崎矣凡百君子審迺所依兮有
崇者邱物無不遂有卓者道愚無不智資生育德
永植勿替

御製補由儀詩辭曰在上曰天在下曰地君君臣臣父

施南府志

卷之八

典禮

四十四

父子子在下曰地在上曰天父父子子君君臣臣
由其儀矣物則熙矣儀其由矣物則休矣迺合樂
歌周南關雎三章召南鵲巢三章卒歌工告備出
執事者行酒主賓以下飲無算爵右樂賓贊禮贊
徹饌衆起離席主人率僚屬在東西上賓介在西
東上皆北面贊拜主人再拜賓介以下皆再拜賓
降西階出介及衆賓從立庠門外之右東面北上
主人降東階出僚屬從送賓於庠門外之左西面
旅揖賓介退禮卒無愆監禮者山主人率僚屬送

於庠門外皆退

右徹饌賓出

日月食救護

通禮府縣遇日月食各按欽天監推定時刻分秒隨時救護各於公署均以正官一人領班行禮正貳教職二人糾儀學弟子員二人通贊二人引班陰陽官一人報時至日設香案於露臺上爐檠具早晚隨日月爲向糾儀通贊引班分列於香案左右布各官拜席於香案陳金鼓於儀門外樂舞生二人奉小鼓於露臺下各官素服陰陽官報日月

施南府志

卷之八

典禮

四十五

初虧通贊贊齊班引班引各官至拜位前立重行異等少進贊跪叩興衆行三跪九叩禮興贊上香班首官進至香案前三上香畢復位贊跪皆跪贊伐鼓樂舞生奉鼓進跪於左正官伐鼓三聲儀門外金鼓振作乃按班更番上香祇跪糾儀二人更番祇立並如前儀陰陽官報日月復圓金鼓聲止通贊贊齊班衆官至拜位前立聽贊行禮如初畢各退

旗纛神致祭之禮

通禮每歲秋季霜降日申令本標弁卒校閱於演武場前一日各營將弁肅隊伍赴校場豫立軍幕屆日黎明軍士環甲列陣中軍建大纛於場正中闔帥以牲醴致祭行二跪六叩禮中軍以下將士均隨行禮畢軍門鼓吹節鉞前導闔帥徧閱行陣還登將臺升帳儀衛左右分列諸將環甲傅臺下中軍詣帳前上行陣圖式請令操兵迺舉旗麾衆合操